

Հայը միշտ սիրում է նմանել: Նա չէ պահպանում իր ինքնուրոյն, յատկանիշ առանձնութիւնները:

Ուխտաւորների մէջ լեզուները մինչեւ անգամ բաժանած էին բարբառներով. մէկի խօսակցութիւնը միւսին համարեա անհասկանալի էր: Յաւալին այն էր, որ շատերը խօսում էին այն ազգի լեզուով, որի լծի տակ ապրում էին, բոլորովին մոռանալով մայրենի խօսքը: Ինձ երեւում էր, իբր թէ այն բազմազան ամբոխի մէջ ազգային ամբողջութիւնը իսպառ քայքայուել էր, եւ քանդուել էին նրա մէջ միաւորիչ յօդերը...

Բայց մի կապ, որ դեռ պահպանուել էր, մի կապ, որ միաւորում էր այն խորտակուած ամբողջութեան զանազան կտորտանքը, մի կապ, որին չէր կարողացել խզել բռնակալի սուրը, դա էր՝ կրօնքը եւ եկեղեցին:

Բայց կարո՞ղ էր պահպանուել այս կապը միշտ անխզելի, իր աստաւծային ամուր հաստատութեան մէջ, երբ նրա հոգատարներն էին՝ Կարապետ հայր սուրբի նման արեղաներ եւ տէր Թողիկի նման քահանաներ...

Եւ այժմ դառն մտածմունքներ պաշարում են ինձ, երբ ծագում է իմ գլխում այդ հարցը...

Սուրբ տիրամօր տօնախմբութիւնը մի կատարեալ տօնավաճառ էր, ուր գլխաւորապէս երկու դաս վաճառականներ հանդես էին հանել իրանց մթերքը եւ կարծես, աննկատելի կերպով միմեանց հետ մրցութիւն էին անում:

Վաճառականների մի դասը բաղկացած էր վանեցի առեւտրականներից, իսկ միւսը՝ վանքի արեղաներից:

Վանեցին դարսել էր հրապարակի վրայ զանազան տեսակ մանրուքներ, կանանց հասարակ զարդեր, գոյնզգոյն փարչաներ, մի խօսքով, այնպիսի խայտաճամուկ ապրանքներ, որոնք կարող էին հրապուրել գնողներին, եւ մինչեւ անգամ ամենախնայող ժլատի քսակից դուրս քաշելով մի քանի դուրուշներ: Ծախողը կանգնած էր իր մթերքների մօտ եւ բարձրաձայն գովաբանում էր իր վաճառքի լաւ յատկութիւնները:

Անցնելով վանեցիներից, գալիս է արեղա-վաճառականների կարգը, եւ քո առջեւ բացւում է մի ահագին հիմնարկութիւն՝ վանքը: Դա բովանդակում է իր մէջ մի հանդիսարան...

Մտնում ես վանքի գաւիթը: Այստեղ, վանքի դռան երկու կողմերից սկսած, մինը միւսի մօտ զուգահեռաբար նստած են «խեղճերը»: Նրանց երկու կարգ շարաւածքի միջով բացւում է մի քուչայ, որ տանում է դէպի վանքի դուռը: Նոյն քուչայով անցնում են ուխտաւորները: «խեղճերիէ այլանդակո-